

# LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch



## In nov forum a Sagogn – il Café rumantsch

Dapi l'entschatta da l'onn datti er a Sagogn in lieu schurmegia per l'assimilaziun linguistica. **Pagina 7**



## La punt da Solas prest en nova glischur

La Viafier retica sanescha actualmain l'enconuschenta punt da Solas sin la lingia da l'Alvra. **Pagina 9**

FMR FUNDAZIUN  
MEDIAS  
RUMANTSCHAS

südostschweiz

## SURSELVA

### Buns cussegls co tractar il personal

Alla dieta dils cautevias dalla gievgia vargada a Landquart al Planthof ei il personal d'alp staus il tema central. La sociologa agrara Sandra Contzen ha presentau alla dieta ina retschera ch'ella ha fatg el decuors digl onn vargau cun personal d'alp. Ella ha vullu saver da signunas e signuns, pasturas e pasturs sch'els seigien motivai da turnar igl proxim onn. E sche buc ha Sandra Contzen dalla Scola aulta dil fatg da Berna dumandau suenter ils motivs da desister. Per regla ein las circumstanzas da luvrar ni da famiglia il motiv per calar dad ir ad alp. E la sociologa ha constatau che la motivaziun da turnar ei pil aulta el Grischun che ell'ulteriura Svizra. (fmr/ac) **Pagina 5**

## SURSELVA

### Sentupadas d'art el Spazi Spescha a Trun

Il Spazi d'art Matias Spescha en localitads dall'antieriura fabrica da ponn a Trun stat uonn ell'enzenna digl anniversari da 100 onns da Matias Spescha. Per quei motiv organischa Trun Cultura treis exposiziuns specialas. Ellas ein dedicadas a treis artists che han enconuschiu, luvrau ni schau inspirar da Matias Spescha. L'entschatta fa l'exposiziun cun ovras da Gaspare O. Melcher, in Grischun che viva ell'Italia. La vernissascha da quell'exposiziun ei sonda proxima. Ei suondan lu exposiziuns da Corsin Fontana e Not Vital el decuors dalla stad ed igl atun. Il Spazi d'art Matias Spescha nezegia Trun Cultura per mussar ovras digl artist oriund da Trun ch'ei morts igl onn 2008. Il relasch cun rondund 1000 ovras han ils artavels digl artist confidau alla Fundaziun Ogna. Lezza metta a disposiziun las ovras per exponer el Spazi d'art Matias Spescha. (fmr/hh) **Pagina 7**



Gaspare O. Melcher sper ina da sias ovras.

FOTO HANS HUONDER

## ENGIADINA

### Proget cumünavel pellas vanzadüras

Sün iniziativa privata da personas illa fracziun Guarda esa gnü ponderà co ramassar ed allontanar vanzadüras our da chadafös e chasadas. L'inizianta Irene Caduff-Hugentobler ha surdat dal 2023 in tuot 112 suottascripziuns al cumün da Scuol. Sün quai ha la suprastanza cumünala lantschà per ün on ün proget da pilot, exclusivamaing pella fracziun da Guarda. La fin dal 2024 es quel proget però gnü conclü. Cun quai cha'l desideri per üna soluziun in chosa exista inavant ha lantschà la suprastanza uosa ün ulteriur proget da pilot. Quel as drizza a tuot la populaziun dal cumün da Scuol. (pl/jd) **Pagina 10**

## In plus dad 88 milliuns francs

Il chantun Grischun ha lavurà bain l'ultim onn. Prest 88 milliuns francs surpli d'entradas noda il quint annual – malgrà ch'igl era budgetà in deficit da 49,6 milliuns francs. Era sche las cifras dal quint 2024 èn bunas, ha il schef da las finanzas Martin Bühler avertì da las sfidas finanzialas futuras.

SANDRO BUCHLI/FMR

«En vista al futur malsegir èsi in bun sentiment, sch'ins po preschentar bunas cifras», ha il responsabel per las finanzas chantunalas Martin Bühler ditg ier gievgia suenter la conferenza da medias a Cuiru. Malgrà ch'il Chantun ha budgetà in deficit da 49,6 milliuns francs, è a la fin resultà in plus da prest 88 milliuns francs per il quint annual 2024. Ina da las raschuns per il bun resultat èn dapli entradas da taglia che spetgà.

«Gist en vista al futur malsegir èsi in bun sentiment, sch'ins po preschentar bunas cifras.»

Martin Bühler, cusseglier guvernativ e minister da finanzas dal Grischun

**Prest ina milliarda agen chapital liber**

Grazia al surpli crescha era l'agen chapital ussa sin radund 3,3 milliardas francs. Ed il chapital ch'è libramain disponibel s'avischina plaun plaunet a la summa dad ina milliarda. Cun varga 420 milliuns francs ha il Chantun ultra da quai cuntanschì l'onn 2024 il pli aut nivel dad investiziuns. «En il futur vesi però ora intsichert», avertescha Martin Bühler. Per l'onn 2025 èsi anc budgetà in quint guliv, ma a partir da l'onn 2026 èn previs gronds deficits. **Pagina 3**

«Nus da Sagogn tschintschein lu per cass in toc pli plaun che quels da Falera.»

Tgi sa, sche quels da Laax tschantschan in tempo tranter las duas vischiancas vischinantas. – Pagina 7




FOTO MICHAEL STEINER

## Flurina Badel premiada per «Tschiera»

L'autura engiadinaisa Flurina Badel survain il Premi grischun da litteratura 2025 per seis roman rumantsch «Tschiera». Quel quinta l'istorgia da duos personas confruntadas culs müdamaints sül marchà d'immobiglias in Engiadina Bassa. Tant la referenza ad evenimaints contemporans sco eir la qualità litterara da l'ouвра han persvas la giuria. (fmr/mst) **Pagina 11**



50011



Servetsch d'abunents e da  
distribuziun: tel. 0844 226 226  
mail: abo@somedia.ch

9 771424 749004